

藝術典第四百十七卷

醫部彙考三百九十七

婦人帶下門一

黃帝素問 骨空論

任脈爲病女子帶下瘕聚

注任脈循于腹故其病在腹

漢張機金匱要略 帶下病脉證

婦人之病因虛積冷結氣爲證經水斷絕至有歷年血寒積結胞門寒傷經絡凝堅在上嘔吐涎唾久成肺癰形體損分在中盤結繞臍寒疝或兩脅疼痛與臟相連或結熱中痛在關元脉數無瘡肌若魚鱗時著男子非止女身在下未多經候不勻令陰掣痛少腹惡寒或引腰脊下根氣衝氣衝急痛膝脛疼煩奄忽眩冒狀如厥癰或有憂慘悲傷多嗔此皆帶下非有鬼神久則羸瘦脈虛多寒三十六病千變萬端審脉陰陽虛實緊弦行其針藥治危得安其雖同病脉各異源詳加辨記勿謂不然問曰婦人年五十所病下利數十日不止暮即發熱少腹裏急腹滿手掌煩熱唇口乾燥何

也師曰此病屬帶下何以故曾經半產瘀血在少腹不去何以知之其證唇口乾燥故知之當以溫經湯主之

帶下經水不利少腹滿痛經一月再見者土瓜根散主之

晉王叔和脉經 脉證

大風邪入少陰女子漏白下赤

師曰婦人帶下六極之病脈浮則爲腸鳴腹滿緊則爲腹中痛

數則爲陰中癢痛則生瘡弦則陰疼掣痛

師曰帶下有三門一曰胞門二曰龍門三曰玉門已

產屬胞門未產屬龍門未嫁女屬玉門

問曰未出門女有三病何謂也師曰一病者經水初下

陰中熱或有當風或有扇者二病者或有以寒水洗之三病者或見丹下驚怖得病屬帶下

師

曰婦人帶下九寶中事假令得鼠乳之病劇易當劇有期當庚辛爲期餘皆倣此

問曰有一婦

人年五十所病但苦背痛時時腹中痛少食多厭喜臌脹其脉陽微關尺小緊形脈不相應願知所

說師曰當問病者飲食何如假令病者言我不欲飲食聞穀氣臭者病爲在上焦假令病者言我少

多爲欲飲食不食亦可病爲在中焦假令病者言我自飲食如故病爲在下焦爲病屬帶下當以帶

下治之

問曰婦人病如癰疾鬱冒一日二十餘發師脈之反言帶下皆如師言其脉何類何以

別之師曰寸口脈濡而緊濡則陽氣微緊則榮中寒陽微衛氣虛血竭凝寒陰陽不和邪氣舍於榮

衛疾

一作候

起年少時經水來以合房室移時過度精感命門開經下血虛百脉皆張中極感陽動微

風激成寒因虛舍榮衛冷積於丹田發動上衝奔在脅脇津液掩口入涎唾涌溢出眩冒狀如厥氣衝髀裏熱粗噤名爲癰灸之因大劇

診婦人漏血下赤白日下血數升脈急疾者死遲者生

診婦人漏下赤白不止脈小虛滑者生大緊實數者死

婦人帶下脈浮惡寒漏下者不治

唐孫思邈千金方 赤白帶下崩中漏下

諸方說三十六疾者十二癰九痛七害五傷三瘕不通是也何謂十二癰是所下之物一曰狀如膏二曰如黑血三曰如紫汁四曰如赤肉五曰如膿痂六曰如豆汁七曰如葵羹八曰如凝血九曰如清血血似水十曰如米泔十一曰如月浣乍前乍却十二曰經度不應期也何謂九痛一曰陰中傷痛二曰陰中淋瀝痛三曰小便卽痛四曰寒冷痛五曰經來卽腹中痛六曰氣滿痛七曰汗出陰中如有蟲嚙痛八曰脅下分痛九曰腰脇痛何謂七害一曰竅孔痛不利二曰中寒熱痛三曰小腹急堅痛四曰臟不仁五曰子門不端引背痛六曰月浣乍多乍少七曰害吐何謂五傷一曰兩脅支滿

痛二曰心痛引脅三曰氣結不通四曰邪思洩利五曰前後痼寒何謂三痼一曰羸瘦不生肌膚二曰絕產乳三曰經水閉塞病有異同方亦不一 按產寶方云帶下三十六疾者是十二癰九痛七害五傷三固謂之三十六疾也十二癰者是所下之物一者如膏二者如青血三如紫汁四如赤皮五如膿痂六如豆汁七如葵羹八如凝血九如清血十如米泔十一如月浣十二如經度不應期也九痛者一陰中痛二陰中淋痛三小便痛四寒冷痛五月來時腹痛六氣滿來時足痛七汗出陰中如蟲嚙痛八脅下皮痛九腰痛七害者一害食二害氣三害冷四害勞五害房六害妊七害睡五傷者一竅孔痛二寒冷痛三小腹痛四臟不仁五子門不正引背痛三固者月水閉塞不通其餘二者文缺不載而千金所說三十六種疾皆由子臟冷熱勞損而下起於陰內也

宋陳自明婦人良方 帶下有五

婦人帶下其名有五因經行產後風邪入胞門傳於臟腑而致之若傷足厥陰肝經色如青泥傷手少陰心經色如紅津傷手太陰肺經形如鼻涕傷足太陰脾經黃如爛瓜傷足少陰腎經黑如衄血人有帶脉橫於腰間如束帶之狀病生於此故名爲帶

注 按徐用誠先生云前證白屬氣而赤屬

血東垣先生云血崩久則亡陽故白滑之物下流未必全拘於帶脉亦有濕痰流注下焦或腎肝陰淫之濕勝或因驚恐而木乘土位濁液下流或思慕爲筋痿戴人以六脉滑大有力用宣導之法此瀉其實也東垣以脈微細沉緊或洪大而虛用補陽調經乃兼責其虛也丹溪用海石南星椿根皮之類乃治其濕痰也竊謂前證皆當壯脾胃升陽氣爲主佐以各經見證之藥色青者屬肝用小柴胡加山梔防風濕熱壅滯小便赤澀用龍膽瀉肝湯肝血不足或燥熱風熱用六味丸色赤者屬心用小柴胡加黃連山梔當歸思慮過傷用妙香散等藥色白者屬肺用補中益氣加山梔色黃者屬脾用六君子加山梔柴胡不應用歸脾湯色黑者屬腎用六味丸氣血俱虛八珍湯陽氣下陷補中益氣湯濕痰下注前湯加茯苓半夏蒼朮黃蘗氣虛痰飲下注四七湯送六味丸不可拘肥人多痰瘦人多火而以燥濕瀉火之藥輕治之也

嚴用和濟生方 論治

巢氏病源論婦人有三十六疾所論三十六疾者七癥八瘕十二帶下是也然所謂十二帶下者亦不顯其證狀今人所患惟赤白二帶而已推其所自勞傷過度衝任虛損風冷據於胞絡此病所由

生也且婦人平居之時血欲常多氣欲常少方謂主氣有原百疾不生儻或氣倍於血氣倍生寒血不化赤遂成白帶氣平血少血少生熱血不化紅遂成赤帶寒熱交併則赤白俱下有室女或室後虛損而有此疾者皆令孕育不成以致絕嗣凡有是證速宜治之久而不治令人面黧黯色肌肉瘦瘠腹脅脹滿攻刺疼痛甚至足脛枯細多苦逆冷危羸不能食矣診其脈右手尺脈浮浮爲陽陽絕者無子苦足冷帶下也

金劉完素六書 論證

赤者熱入小腸白者熱入大腸原其本皆濕熱結於脉故津液湧溢是爲赤白帶下本不痛結緣五經脉虛結熱屈滯於帶故女子臍下痛而綿綿陰器中時下也故經曰任脉爲病男子內結七疝女子帶下瘕聚王注曰任脈自胞上過帶脈貫於臍上故男子內結七疝女子帶下帶脉起於季脅章門如束帶狀今濕熱冤結不散故爲病也經曰脾傳之腎病名曰瘕疝小腹冤熱而痛出白一名曰蠱所以爲帶下冤結也冤屈也屈滯而病熱不散先以十棗湯下之後服苦楝丸大延胡散調下之熱去濕除病自愈也

元張從政儒門事親 赤白錯分寒熱解

精選聖惠方二十三卷論婦人赤白帶下云婦人帶下者由勞神過度損動經血致令身虛受於風冷風冷入於脬絡傳其血之所成也巢氏內篇四十四卷論任脈爲經之海其任之爲病女子則爲帶下手太陽爲小腸之經也手少陰爲心之經也心爲臟主於裏小腸爲腑主於表二經之血在於婦人上爲乳汁下爲月水衝任之所統也衝任之脈既起於胞內陰陽過度則傷脬絡故風邪乘虛而入於脬中損衝任之經傷太陽少陽之血致令脬絡之間穢與血相兼帶而下冷則多白熱則多赤二家之說皆非也夫治病當先識經絡靈樞十二經中有是動之病有所主之病大經有十二奇經有八脉言十二經之外復有此八道經脉也十二經與八道經脈通身往來經絡共二十道上下流走相貫周環晝夜不息與天同度自手太陰肺經起行陽二十五度行陰亦二十五度復會於手太陰肺經也然此二十道經絡上下周流者止一十九道耳惟帶脉起少腹側季脅之端乃章門穴是也環身一周無上下之源絡脬而過如束帶之於身難經曰帶之爲病溶溶如坐水中衝任者是經脈之海也循腹脅夾臍旁傳流於氣衝屬於帶脈絡於督脉督脉者起於關元穴任脉者女子主

養胎孕之所督脉乃是督領婦人經脈之海也衝任督三脉同起而異行一源而三岐皆絡帶脉衝任督三脈皆統於篡戶巡陰器行廷孔溺孔之端衝任督三脈以帶脈束之因餘經上下往來遺熱於帶脈之間熱者血也血積多日不流火則從金之化金曰從革而爲白乘少腹間冤熱白物滑溢隨洩而下綿綿不絕多不痛也或有痛者則壅礙因壅而成痛也內經曰少腹冤熱洩出白液冤者屈滯也病非本經爲他經冤抑而成此疾也冤一作客客猶寄也遺客熱於少腹久不去從金化而爲白設若赤白痢赤者新積也從心火白者舊積也從肺金故赤白痢不可曲分寒熱止可分新舊而治之假如癰癰始赤血次潰白膿又豈爲寒者哉而病者未爲信也此金之劉河間常言之矣皆云寒多則白以乾薑赤石脂桃花丸治痢雖愈後必生血疾如白帶下病徑以白芍藥乾薑白帶雖愈則小洩必不利治瀉痢與治帶下皆不可驟用峻熱之藥燥之燥之則內水涸內水涸則必煩渴煩渴則小便不利小便不利則足腫面浮漸至不治內經曰思想無窮所願不得意淫於外入房太甚發爲筋痿淫衍白物如精之狀男子因洩而下女子綿綿而下左傳曰少男惑長女風落山之象是爲惑蠱之疾其文三蠱同皿曰蠱乃是思慕色慾內生侵蝕蝕甚不可便用燥熱之藥攻之漸至

形削羸瘦脈大者必死而不救且赤白痢者是邪熱傳於大腸下廣腸出赤白也帶下者傳於小腸入脬經下赤白也據此二證皆可同治濕法治之先以導水丸禹功散瀉訖次以淡劑降心火益腎水下小溲分水道則自愈矣頃頓丘一婦人病帶下連綿不絕白物或來已三載矣命予脈之診其兩手脈俱滑大而有力得六七至常上熱口乾眩暈時嘔酸水余知其實有寒痰在胷中以瓜蒂散吐訖冷痰二三升皆酸水也間如黃涎狀如爛膠次以漿粥養其胃氣又次以導水丸禹功二方以瀉其下然後以淡劑滲洩之藥利其水道不數日而愈余嘗悟內經中所云上有病下取之下有病上取之又上者下之下者上之然有此法亦不可偏執更宜詳其虛實而用之故知精選聖惠方帶下風寒之言與巢氏論中赤熱白寒之說正與難素相違予非敢妄論先賢恐後學不明未免從之而行也如其真學之人不察病人脈息不究病人經脈妄斷寒熱信用羣方暴熱之藥一旦有失雖悔何追嗚呼人命一失其復能生乎赤白痢與赤白帶下皆不死人內經惟腸澼便血血溫身熱者死赤白帶下白液白物蠱病腎消皆不能死人有死者藥之誤也 夫婦人赤白帶下或出白物如脂可服導水丸禹功散或單用無憂散量虛實加減瀉訖次用桂苓丸五苓散葶藶木香散同治濕

法治瀉法治之或用獨聖散上涌亦可也室女同

李杲十書 酒煮當歸丸論

婦人白帶下注癰疽腳氣腰已下如在冰雪中以火焙炕重重厚綿衣蓋其上猶寒冷不任寒之極也面白如枯魚之象肌肉如刀割削瘦峻之速也小便不止與白帶長流而不禁固自不知覺面白目青藍如菜色眊眊無所見身重如山行步欹側不能安地腿膝枯細大便難祕口不能言無力之極食不下心下痞煩懊懣不任其苦面停垢背惡寒小便遺而不知此上中下三陽真氣俱虛欲竭噦嘔不止胃虛之極也脈沉厥緊而澀按之空虛若脈洪大而濇按之無力猶爲中寒之證況按之空虛者乎按之不鼓是爲陰寒乃氣血俱虛之極也宜酒煮當歸丸大補大溫

固真丸論

婦人白帶久下不止臍腹冷痛陰中亦然目中溜火視物眊眊然無所見齒皆惡熱飲且痛須得黃連細末擦之乃止惟喜乾食大惡湯飲此病皆寒濕乘其胞內故喜乾而惡濕肝經陰火上溢走於標故上壅而目中溜火腎水侵肝而上溢致目眊眊而無所見齒惡熱飲者是陽明經中伏火也治

法當大瀉寒濕以丸藥治之故曰寒在下焦治宜緩大忌湯散以酒製白石脂白龍骨以枯其濕炮乾薑大熱辛瀉寒水以黃蘗之大寒爲因用又爲鄉導故云古者雖有重罪不絕人之後又爲之伏其所主先其所因之意又瀉齒中惡熱飲也以柴胡爲本經之使以芍藥五分導之恐辛熱之藥太甚損其肝經故微瀉之以當歸身之辛溫大和其血脈名曰固真丸用藥之法備矣

補經固真湯論

婦人心胞尺脈微其白帶下流不止者何按叔和云崩中日久爲白帶漏下多時骨髓枯蓋血崩久則血少復亡其陽故白滑之物下流不止是本經血海將枯津液復亡枯乾不能滋養筋骨以本部行經藥爲引用爲使以大辛甘油膩之藥潤其枯燥而滋益津液以大辛熱之氣味藥補其陽道生其血脈以苦寒之藥泄其肺而救上熱傷氣以人參補之以微苦溫之藥爲佐而益元氣名曰補經固真湯此證之要藥也

朱震亨心法 總論證治

帶下赤屬血白屬氣

主治燥濕爲先

漏與帶俱是胃中痰積流下滲入膀胱無人知此只

宜升提甚者上必用吐以提其氣下用二陳湯加蒼朮白朮仍用丸子

一本作瓦礫子

赤白帶下皆屬

血出於大腸小腸之分

肥人多是濕痰以海石半夏南星炒礬蒼朮芎藭椿皮青黛之類

瘦人白帶少如有者多熱以炒黃礬滑石椿皮川芎海石青黛之類作丸子服無海石蛤粉亦可

赤白帶下或十棗湯或神佑丸或玉燭散皆可服實者可服虛者不可峻攻此羅先生法也

血

虛者加減四物湯

氣虛者參朮陳皮間與之

濕勝者用固腸丸

相火動者於諸藥中

少加黃蘗

滑者加龍骨赤石脂

滯者加葵花白帶用白葵花赤帶用赤葵花

性躁者

加黃連

痰氣帶下者蒼朮香附滑石蛤粉半夏茯苓丸服寒月少加乾薑臨機應變必須斷厚

味

治結痰白帶心下悶先以小胃丹半饑半飽津液下數丸候鬱積開却宜服補藥

赤白

帶者皆因七情內傷或下元虛憊感非一端叔和云崩中日久爲白帶

漏下多時骨髓枯蓋崩

久血少亡陽故白滑之物下流不止東垣言之詳矣不可不知

帶下與夢遺同法治之

明戴思恭證治要訣

總論證治

赤白帶下皆因七情內傷或下元虛冷感非一端大率下白帶多間有下赤者並宜順氣散吞震靈

丹仍佐艾附圓或米飲調沙參末

帶下不止成疰羸者四物湯加煨牡蠣粉半錢吞固真圓多

服取效

有帶疾愈後一二月或再發半年一發先血而後下帶來不可遏停畜未幾又復傾瀉

此名漏帶難最難治者也

下截之血小腹主之有因血虛而虛熱陷入小腸致小便澀痛色白

如泔或成沙粒不可作淋治用冷劑宜以四物湯五苓散各半貼和煎

李梴醫學入門

總論證治

經曰小腹冤熱洩出白液冤者濕熱凝滯結於五臟自胞上而過帶脉出於大小腸之分淋瀝以下故曰帶下赤屬血白屬氣其證頭昏目眩口苦舌乾咽噎腫燥大便或閉或溏小便澀皆熱證也如赤白痢濁一般但不痛耳間有痛者濕熱拂鬱甚則肚腹引痛婦人服食燥熱性行乖戾以致肝旺脾虧而生濕熱熱則流通古人有用導水丸下之繼以淡劑滲之或苦楝丸大元胡索散調之如臍

腹痛者暫以辛溫開導如大溫經湯補經固真湯龜蘘薑梔丸是也

瘦人多熱脉數外證潮煩

乃陰虛火盛也苓蘘樗皮丸帶不止者用地骨皮一兩生地五兩酒十盞煎至三盞分三次服或白芷散單益母丸白帶兼痛風者二陳湯加蒼蘘南星牛膝川芎兼頭風鼻涕者蒼蘘辛芎散兼七情

者側藥樗皮丸

肥人多濕身黃脉緩陰戶如冰或痛白帶升陽燥濕湯四炒固真丹

濕痰

流下滲入膀胱宜二陳湯加二朮升麻柴胡或蒼藥樗皮丸如結痰白帶淋瀝不已者先以小胃丹半饑半飽津液下數丸候鬱積開服芩朮芍藥丸

通用五苓散合四物湯或單樗白皮炒爲末

酒糊丸血虛加四物湯氣虛加參朮陳皮火動加黃蘗滑久加龍骨赤石脂性燥加黃連腹痛加乾薑

因月水淋瀝不已或崩中暴下或產後去血過多以致陰虧陽竭榮氣不升經脉凝泣衛氣

下陷精氣累滯於下焦蘊積而成白滑如涕下流腥臭者黃芪建中湯去桂加當歸水煎吞苦楝丸

久不止臍腹引陰冷痛者東垣固真丸虛中有火者補經固真湯大烏雞丸常用氣虛四君子湯血

虛四物湯有火加黃蘗有寒加桂附

始因亡血復亡其陽陽氣虛極帶下腥臭多悲不樂附桂

湯腹痛陰冷者四物湯加桂附常用酒煮當歸丸小烏雞丸蠡斯丸琥珀調經丸

風邪入於胞

門或中經脈流傳臟腑若傷肝經青如泥色傷心經赤如紅津傷肺經形如白涕傷脾經黃如爛瓜

傷腎經黑如衄血宜胃風湯或五積散去麻黃主之通用單地榆散

室女經水初下一時驚悸

或浴以冷水或當風取涼故經水止而卽患帶下宜琥珀砂丸

孕婦帶下全是濕熱宜芩朮

構皮丸

平時陰陽過多及產後亡血下虛風邪乘虛入於胞絡宜煖宮丸加薑附吳萸或黃芪

建中湯去桂加當歸水煎吞苦楝丸

凡帶下或用升提如升陽調經湯或用收澀如伏龍肝散

白芷散然暫止而終不止者蓋衛司開闔而爲榮血之主脾胃爲血海水液之會衛氣與胃氣俱虛則血液無所約制故古方有用桂枝湯加附子以固衛氣者四君子湯加草果丁香木香以燥水健脾者或用理中湯加陳皮半夏或單半夏丸用芎歸煎湯下或補中益氣湯平胃散皆補衛厚脾使氣血自循故轍而不專於收澀以劫奪之也 又有白淫一證如白精之狀不可誤作白帶過服

熱藥

脉法

帶下崩中脈多浮動虛遲者生實數者重

腎脈浮遲主患帶澀

薛己醫按 論證

婦人帶下或因六淫七情或因醉飽房勞或因膏粱厚味或服燥劑所致脾胃虧損陽氣下陷或濕痰下注蘊積而成故言帶也凡此皆當壯脾胃升陽氣爲主佐以各經見證之藥

王肯堂證治準繩 論證

婦人有白帶者乃是第一等病令人不能產育宜急治之此扁鵲之過邯鄲聞貴婦人所以專爲帶下醫也 帶下之證有三未嫁之女月經初下止而卽浴之以冷水或熱而扇或當風此室女病帶下之由也有家之婦陰陽過多卽傷胞絡風邪乘虛而入胞經觸冷遂使穢液與血水相連而下產後帶下由亡血失氣傷動胞絡門開而外風襲肌體虛而冷風入風與熱氣相連故成液而下冷則多白熱則多赤冷熱相交則赤白俱下

論潔古治法

帶下少腹冤結而痛者先以十棗湯下之次服苦楝丸大元胡散調之是先攻後補之法也不可不知 結痰白帶以小胃丹半饑半飽津液下數丸候鬱積行却服白朮一兩蒼朮半兩紅白葵花二錢半白芍藥七錢半蒸餅爲丸空心煎四物湯下二十丸以補之

燥濕法

有濕痰而弱不禁攻者燥之熱濕宜涼燥寒濕宜溫燥